

ديوان عامية



لوني متلّون بلونك



الفنّانة الشاملة



هالة لاشين

صدرت الطبعة الأولى في أغسطس 2019

بطاقة الكتاب

عنوان المؤلف	لوني متلون بلونك
المؤلف	هالة لاشين
التصنيف	أشعار وخواطر
رقم الإيداع	2019 - 14753
الترقيم الدولي	978-977-6726-41-3
رقم الإصدار الداخلي	456 الطبعة الأولى أغسطس 2019
عدد الصفحات	100 صفحة
الغلاف والإخراج	مؤسسة النيل والفرات
تنسيق وإعداد	الشاعر وليد مليجي

جميع حقوق الطبع والنشر محفوظة للمؤلف، ولا يحق لأي دار نشر طبع ونشر وتوزيع الكتاب أو ترجمته أو الاقتباس منه أو نشره على النت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 تليفاكس: 020554372901

النيل والفرات nagyegy200064@gmail.com

النيل والفرات alnilwaalfourat@gmail.com

(القر الرئيسي: ج.م.م. محافظة الشرقية - العاشر من رمضان - مجاورة 13 - امام سنتر الـ 13 - عقار 304

تقديم



لوني متلون بلونك .. كتابي الثاني بين أيديكم ..
بحروفه ومشاعره الانطباعية .. لا تعجزني تفعيلة ..
ولا يصعب عليّ بحر في عروض الشعر ..
لكن تروق لي حروفي وموسيقاي ..
أتمنى أن ينال كتابي إعجابكم

هالة لاشين



إهداء



أهدي كتابي لكل من كان لي طاقة إيجابية..

لكل من ساندني ودعمني وشجعني..

ووقف بجواري..

لكل من أنار لي طريقا معتما...

لكل من عاش كلماتي وتعمق بين سطوري..

وأیضا لكل من انتقد ما خطه قلمي البسيط.

هالة لاشين



الطريق الغلط



للي رايح واللي جاي عماله تبكى

أى حد تقابله في سكتها تحكى

إنه مش بايدى والذنب مش ذنبي

لا... إنتى مش قدها مهما عملتى

بتخبي ليه وتدارى على كل خلق الله

هو حرام ولا عيب اللى انتى عاملاه

طول ما انتى ماشية صح

إمشي فى الطريق اللى انتى عارفاه

عشتي وزرعتي الزرعة

وحصدتي إيه من زرعتك

دا إنتى لكل اللى حوالىكي بايعة

ودوستي علي الكل في سكتك

إخترتي تمشى في الطريق الغلط

سيبتى الرمل ومشيتى علي الزلط




خليك باصص لفوق



غمض عينك وإنسى الجاي
طول ما بخير في الدنيا وحي
فكر إنك دايمًا عافي
وانسى العتمة وعيش في الضي
وخليك دايمًا باصص فوق
مهما الدنيا هتكسر فيك
إمشى وسيبها وخلي عينيك
دايمًا دايمًا باصصة لفوق
وإحمد ربك إنك ماشى
على رجلك
وخليك دايمًا باصص فوق
ومهما إن كنت ف يوم معذور
وجيبك ما فيهوش حتى جنيه
إوعاك تغضب ولا تثور

ليك من غيره راح تدعيه
وخليك دايمًا باصص فوق
إوعي تصدق حد يقول لك
على طريق الشر تتوه
خلي قلبك هو يدلك
على طريق الخير والنور
وخليك دايمًا باصص فوق
إمشي طريقك واسعي لرزقك
ودايمًا خلي النية سليمة
صفي قلبك وإدعي لربك
واوعي تبص لفوق بغرور
دا اللي بيدعي يشوف النور
وخليك دايمًا باصص فوق....



أوقات



أوقات باحس
انك حبيبي ف دنيتي
وانك أمان في كل
خطوة ف سكتي
ولو غمضت عيني
هلاقي إيدي ف إيديك بتضميني
وخطوة قلبك مسابقة خطوتي
مطمنة ومفيش حكاية تهمني
واوقات بحس انك ولا حاجة
واني ليك مش محتاجة
واني ماشية الطريق ولاهمي
باضحك واهزر و مش همي
ماعادش ف قلبي ليك
حاجة تفكرني بيك

ولا شايلة حاجة فُ يوم
ممکن ترجعني ليك
مش هازود في الكلام
أو أكثر م الملام
الكلام ده كله واضح
ومش محتاج علام....



صرخة مكتومة



إنت عارف لما تجرح حد منك،،

ممکن يحصل له إيه،؟

عمرك ما فكرت إنك،،

بجرحك ده بتدوس عليه،،

وأما كنت تغمي عنيك،،

عشان ماتشوفش عملت إيه،،

غمي أكثر واعمل مابدا لك،،

كل ده هتندم عليه،،

و عمره ما هيخطر في بالك،

إنك كنت في يوم بتقسي عليه،،

لما تجرح فاكـره حق،،
ولو اتكلم هتقول له لأ
ولما يسأل هتقوله إيه ولا إيه،
هتقول له خايف عليك وبانصحك؟
هتقول إيدى في إيدك وبعلمك؟
نمشي الطريق وهاوصلك؟
ونسيت إنك لو ظلمت مرّة
هتلاقي اللي يظلمك



ساعدي انساك



قررت خلاص هابعد بعيد

ومش هانفذ أى وعد

مش باقي ليك عندي رصيد

وكل حاجة وليها حد

مش هافضل اعيد وازيد

ما الحكاية خلاص بانت

ومش هاقول كلام جديد

وكل حاجة بيننا هانت

خليك بعيد أحسن لك

وماتعرفش حاجة عنني

ما انا كل حاجة حاكيها لك

وهو ده اللي مجنني

هاحاول انسى كل شىء

وانت كمان لازم تساعدني



عكس التيار



دخلت سجن سألت فيه

كل واحد إيه تهمته،،

قال الزمن جار عليه

ودي نهاية سكته

عديت وفوت بعدها

علي ناس كتيركان ردها،،،

أنا اللي قلت الحقيقة وما زوقتش كلامي

الناس طلعت بريئة،،

وبقت أنا اللي جاني،

عديت وفوت بعدها

على ناس كثير كان ردها

أنا اللي عمري ما كذبت

وكتير من الناس صاحبت

كذبوا عليا كلهم

و انا اللي عليهم صعبت

عديت وفوت بعدها

عل ناس كثير كان ردها،،

أنا اللي عمري ما نافقت

وكنت باقول الحق

ولا جيت في يوم جاملت

ولا قلت علي الآه لأ،،

عديت و فوت بعدها

على ناس كثير كان ردها

وانا اللي الشر عمري ما اتمنيته لحد

وكنت اتمني الخير للغير

وكانت طيبي ملهاش حد

بقيت في عنيهم أنا الشرير

خرجت من السجن وقتها

لقيت الدنيا ماشيه في طريقها

والناس هيا اللي ماشية بضرها



لما تكون بتحب بجد



تعرف منين إنك حبيت بجد ؟
لما تقول الحقيقة لأي حد
و تحل المشاكل وتنفذ الوعد
لما تمشي الطريق ماتلقى أي سد
لما نسمة تاخذك لفوق في السما
لما تكره الكذب كره العمى
لما الفرح والهنا يدقوا بابك
وتنسى الشقا وأيام عذابك
وتقول يا قلبي إيه اللي نابك
لما الكل في عنيك يبقوا أحبابك
لما تصحى على زقزقة العصافير
وتلاقي نفسك بتدور ع الخير
وروحك تبقى هايمة زي الطير

لما تتمنى السعاده للغير
لما تشوف الدنيا بعيون ثانية
لما تنسى همها في ثانية
لما قلبك يدق دقه زيادة
لما تحب الحياة حب عبادة
وتشرب قهوتك سكر زيادة
وتنسى زمن العبيد والسيادة
هتلاقي بيان السما مفتوحة
والأفكار سهلة ومسموحة
وملامح الحب في عينك مفضوحة
لما تكون بتحب بجد



متفقين



قولى ياقلب .. أيوه يا عقل

تعالى هافكر وياك حبة .. بتحس بإيه لما تحب ؟

باحس بدقة قلبى تزيد .. دمي بيجري جوه ويريد

باحس ياني باصب الميا فوق الزرع

طب إيه تانى وضح أكثر؟

و إني بحب الكون كله وبامسح بإيدي كل الشر

و آخذ إيد حبيبي وأقول له

تعالى هنرسى سوا ع البر

وانت يا عقل قولى حكائتك

باحس بعقلي مليون ضرب

خبط ووزع ودق و حرب

ومش بافكر غير في حبيبي

وحاسس إنه هو نصيبي

و ان فكرت ف مرة أطنش

طيفه يجيني ويدخل بابي

يملا عليا الكون حنية

حتى ان كان هو عذابي

الله علينا احنا الاتنين

أحلي احساس علي وجه الارض

هنعيش دائما متفقين .. لو ضمينا ايدينا لبعض



كلمة تشبه لها



هاسأل عنك واسأل عني

ما انت قربك بيظمني

واوعى ف يوم تبعد عني

بعدك عني بيظمني

ما تخليش الشوق يلاعني

ما تحاولش انك تتعبني

بعدك عني نار تكويني

قلبي وداب من كتر حنيني

وحشتني ومش هقولها

هسيبك تحسها

وحشتني كلمه مش حلوة

لو رجعت لأصلها

الوحشة في التفكير مشكلة

بندور على حلها

وايه بديل الكلمة تعالى

ندور على كلمة تشبه لها



معدور يا قلبي



يا قلبي ازای قدرت تنسي عذابك

وقدرت كمان تمحي آلامك

ده المر زاد والفرح غاب

ومافضلش ليك غير العذاب

أنا باحسد فيك صبرك وقوتك

إزاي ماقدرتش تبدل محبتك

لكره و شر فين قسوتك؟

وفضلت حنين وبسيط

معلش أعذرني انت عبيط

بتحن لهم بعد ما هجروك

بتشتاق لهم بعد مارموك

هتذوق الحقيقة وتشفع لهم

هتقول دى ناس بريئة ومش قصدهم

لا ياقلبي إنت مش زيهم

ليه تخلي حياتي عذاب


ليه تدفني تحت التراب

ليه حارسهم بمليون باب

حاول تطلع للنور

واجه و ماتبقاش مكسور

مهما عملت هتكون معذور



الله عليك



الله عليك ياغالي
يا اللي معاك الدنيا بتحلى لي
الأيام معاك جنة الدنيا
ليا بس شايلها لي
لو غمضت عيني بإيديك
هاشوف الدنيا بعينيك
لو لمست قلبي بحنانك
هاعمل المستحيل عشانك
سرحانة بفكر فيك كل ليلة
عشقت فيك صفات جميلة
لمسة إيديك تداوي الجراح العليلة
ما تطمعش ف حبي ليك
ده كل حاجة ف إيديك
تقدر تخليني أسرح

وافكر فيك وبإيديك
تبعدني عن عينيك
وقفت معايا في جرحي
وداوبته بحنانك
وكنت معايا في فرحي
في عز أحزانك
شيلت المرار من جوايا
وانت في شدة آلامك
أنا غيرتي عليك حد الجنون
أنا حبي ليك ما يتوصفش
بس انت جرب حبي يوم
وقرب مني و ما تخافش



قلبي دق



قلبي دق و عيوني مالوا
إنت عشقي مهما قالوا
لوقالوا لي مش داري بك
أو قالوا لي مش حبيبك
مهما قالوا فيك وعادوا
إنت بس اللي حبيبي
عمري ضاع ويا الغياب
قلبي داب من العتاب
وف حياتي الفرح غاب
مابقاش فاضل لي
غير العذاب
لما قلبي دق دقة
للغرام ماقالش لأه
حسيت معاه كل المعاني

والحياة بالحلو سابقة
لما قلبي دق تانى
لقيت معاه كل الأمانى
اللى ياما حلمت بيها
كلها لحن و أغاني



بقينا كده ليه



سألت وقولت

هو إحنا بقينا كده ليه؟

سؤال ما حدش جاوبني عليه

ودلوقتي عرفت بقينا كده ليه

بقينا نخاف نسأل على بعض

واتعلمنا إزاي ننسى الوعد

بقينا نفكر في نفسنا

ولا بقى حد يهمننا

وبقينا نتوه من بعضنا

ولسه بأسأل

هو إحنا بقينا كده ليه؟

بقينا نمسك على الواحدة

ونقف لبعض على الغلطة

ونعمل من الحبة قبة

ولسه باسأل

هو احنا بقينا كده ليه؟

بقينا ننام ومانشيلش همنا

ظلمنا جرحنا ولا بيهمنا

المهم ننام وترتاح نفسنا

عرفتوا دلوقتي

هو احنا بقينا كده ليه!!!!



ليه أكون لك



ليه أكون لك مر ومرار
وانت اللي حبك جوايا نار
ليه أكون لك حزن وشجون
وانا اللي فكري بيك مجنون
ليه أكون لك قلق وزحمة
وانت اللي ليا هوان ورحمة
ليه أكون لك نسيان وهجر
وانت اللي ليا ليل وفجر
ليه أكون لك شك وغيره
وانت اللي ليا أحلام كبيرة
ليه أكون لك حلم بعيد

وانت اللي ليا ليلة عيد
ليه أكون لك امتحان صعب
وانت اللي ليا أغلى حب
ليه أكون لك وسوسة شيطان
وانت اللي ليا كل الأمان



أنا الصديق



الصد والرفض طبع فينا
دايما بنطلب اللي لينا وبننسى اللي علينا
الدنيا زي بحر لو نزلنا فيه هنغرق
خلينا واقفين بس برجلينا
إديت لنفسك الحق
سمعت الآه ورفضت ال لأ
فسرت كلامي بمزاجك
كأني تعبان محشور في الشق
كنت زي طالب فاشل ماشي بعقله
بيجري ورا أي قلب ينده له
ويجيب اللوم عليه
دور على اللي يستاهلوا

مش هأقولها تانى
ولا ف يوم هاقول انسانى
خلى إحساسك الأول
وخلى عقلك التانى
ومش لازم تقولها بلسانك
المعنى واضح فى كلامك
ولما تختار البعد مكانك
مش هيكون عليك الملام
يا اكون لك انا الصديق
وادلك على الطريق
اللى فيه هتمشي
وماتكونش ف بحرك غريق
يا تبعد وتمشى ف طريقك
وتخلى إحساسك صديقك
عشان ترتاح من ظنونك
وتقفل عينيك و تنام




إحساسى بىك



غمضت عيني
وتوهت ف أحلامي
الشوق زاد فيا وحببي جفاني
جوايا حنين وأسيه وقلب بيعاني
مقدرتش اتكلم
وباخبي وبداري
صرخة جوايا كتمتها بإيدك
ده انا بافهمك
من غير ما تتكلم
ما انا باقرا لغة عينك
ما تكتمش الصوت جوايا
ماتشتش أفكارى

ماتغيرش فْ كلامك ليا
أنا اللي أدري بإحساسي
إحساسي بيك مالوش وصف
إحساس بيعصر قلبي عصر
إحساس فقير وسكنوه في قصر
إحساسي بيك
مالهوش نهاية.
إحساسي بيك مالهوش نهاية.



سمااح



لما عيني جت في عينك
حسيت كأني طير
ولولمست ف مره إيدك
تملا كل الدنيا خير
كلمه بحبك تشفي
بيها عليلي
هافضل اقولها طول
نهارى وليلي
بوسة الشفايف للي خايف
يقول إحساسه إيه
دي البصة في عيونك تسوى
100 مليون جنية

قرب وبوسني بوسة
علي الجبين
أحس بيها إني ملكت الكون
وقفلت عليه الكفين
وشيل الطرحة من علي وشي
هتلاقي طرحة تانية تحتها
من كسوفي وكتر خوفي وقتها
يترسم علي وشي الخجل
وادراي علي عيوني
برموشي وكحلها
إحساسي بيك هو البراح
اللي فيه هترمح
من غير ما تطلب السماح




إحنا لبعض



إحنا الحب والوفاء
بدأنا حبنا بالاتفاق
عشنا ف حب وأمان
ولا عمر حد فينا خان
هو فيه في الدنيا غيرنا
عهد واحد كان مصيرنا
عشنا فيه كل المعاني
مافي شيء مرة كسرنا
حتي لو حد غيرنا
سيبناهم ومشينا
ف طريقنا
ولا مره بصينا ورانا

و كنا لبعض أمانة
ليه الحزن في عيونك
مدرايه تحت جفونك
فتح عينك وبص لي
ده لوني متلون بلونك
عشقت الكلمه في عينيك
ودويت بلمسة منك
ياريت افضل بين إيديك
ولا ابعد في يوم عنك
يارب تتحقق أحلامك
و تتداوي كل آلامك
وتشوف الدنيا بعيونك
لوحة الدنيا راسماها لك




وهم وخیال



هأعمل لك محاكمة
وأسألك مليون سؤال
هتبقى إنت المتهم
ومن الهروب مفيش محال
وهاسألك نفس السؤال
ليه بتضحك من سؤالي
ده السؤال جواه كلام
ليه بتجرح قلبي دايمًا
ليه تكثر في الملام
ده أنت عايش
في برج عالي
واللي حواليك
يتمنوا منك السلام

بس أنا اللي عقلي
كان خيالي
وكان متصور له
حبة أوهام
وكنت حاطه فُ بالي
إني ممكن اوصل لك
في يوم..
بس أكيد ده وهم جالي
وكنت ليا حلم فُ منام



قد الكلمة



قول اللي ف قلبك

ماتخبيش

قول إحساسك كله

ماتدرايش

عني أى كلام

وان مره سألتك مالك

إوعى تقول لي ماليش

حد يبعد في يوم عن روح

عن إيد بتداوى جروح

اللي بنظرة منه

الاحزان تروح

أبعد ازاي وليه العند

ده انا حبيتك حب بجد
ده انت الحب
اللي دورت عليه
وحبيتك حب مالهوش حد
انت ليا الدنيا بحالها
شوفت معاك
فرحتى وجمالها
كنت معايا قد الكلمة
كنت معايا قد الوعد



نصيحة



عاوزة أقولك كام نصيحة
خليكي واضحة وصريحة
وقولي دايمًا على الحقيقة
لا تلفي ف يوم ولا تَدوري

واوعي ف يوم تتمنظري
ولا حتى لثانية تفكري
إن بخبثك ده هتقدري
على كل القلوب تسيطري

خليكي دايمًا قريبة
في عيون الناس طيبة
ولو حتى كنتي معيبة
إوعي ساعتها تزعلي

خليكى دايما مفتحة
لكل اللي حواليكى مصححة
ولو حد قرب منك
لازم تكونى مصرحة

خليكى زى المسطرة
وممكن احيانا منقلة
واوعى تبقي برجل
وتضيعي كل المسألة



مليون باب



إنساني و ماترجعش تاني
إنت عايش بقلب أناني
ما بتفكرش غير في نفسك
لا وكمان بتتحداني تتحدى مين؟؟؟
ده انا اللي الجفا نساني
أحلى سنين عشتها وخالاني
أخذت من الدنيا حسابي .. ومابقاش يهملك عتابي
لو عاتبتك تصرخ تقول
سيبيني أعيش أيام شبابي
كنت شمس ونورها غاب
بقيت مطر وغيوم وضباب
إمشى خلاص ها قفل وراك مليون باب



قلبي حبك



ومين يشوفني أو يبص
وانا اللي قلبي بيك حس
وحبك ملا قلبي وعيوني
قلبي معاك اتولد من جديد
شهادة ميلاد لشوق شديد
وعد مني هتنسى دمك
والفرح هيجري ف دمك
ومش هتفكر حتى إنك
أي حاجة ف يوم تضايقك

إشتريني ..إشتريني ومش هتندم

حبي ليك هيملا قلبك..

ومن الآلام هاداوي جرحك

وهاتحدى الكون بحبك

ونجوم السما ليك هاجيبها

والساعات معاك مش هسيبها


ما أنت ضي العمر كله

وانت نور شمسي وضله

ولو طلبت هطلب إيه

إن العمر يبقى جنبك

عشان بجد القلب حبك



إنتصرنا



الله أكبر..... الله أكبر

بالتحدى إنتصرنا،،

سته أكتوبر هدمنا

خط بارليف الحصين

بالرجولة كله شاف

بالحماس وبالهتاف

عمر فينا ما حد خاف

إنه يخسر معركتنا،،

كنا بنكبر نقول

الله أكبر الله أكبر

يلا هد و يلا دمر

يلا نعب القنال

فرحة إنتصارنا حلوة


شايلة فرحة وفوقها غنوة

وربنا هو المعين

بالتحدي إنتصرنا

سته أكتوبر هدمنا

خط بارليف الحصين



لوني متلون بلونك



لوني متلون بلونك
و الكلام زى الكلام
و الأمانى اللي ف عيونك
عشت بيها ألف عام
لما اشوفك
بالقى كل الدنيا جنبي
و اما تضحك
يتملي بالفرح قلبي
و اما تحكم
أفتكر يوم الحساب
و اما تزعل
يتقفل ميت ألف باب
و اما باتكلم معاك
ننطق الكلمة سوا

مانت فرحي و انت شوقي
و انت جرحي و الدوا
و الحياة مُرة بدونك
مش بقول لك
لوني متلون بلونك




طبع غالب



لما كانت تيجي سيرتك
كانوا يعيدوا ويقولوا
كنت ساعتها ب ارد غيبتك
ويقولوا مهما يقولوا
مهما حكوا وقالوا عنك
أنا الوحيدة اللي عارفه إنك
الحنان والطيبه منك
هما طبع فيك وغالب
مهما قالوا فيك وعابوا
ماهو عقاب الندل اجتنابه
سيبه وسد ودانك عنه
عمره يوم ماهيتعدل
مهما تفضل فيه تعاتب

لما كانت تيجي سيرتك
كنت ادافع وأقول ده غايب
وما اجيش سيرتك
إلا بس للحبايب
عشان ما اسمعش منهم
إلا كلمة حلوة
ما انا قلبي بيحبك و دايب



صوت الموت



من إمتي الموت بقى له صوت؟؟

موت يا جماعه يعني سكوت

عاوز تعرف غلاوتك عندهم

ما انت مهما عملت

بعد الموت هتبقى كيوت

عشان روحك وسبتهم

وعن أذيتهم بعدت

ما أنت ياما ضايقتهم

و في الآخر إنت مت

بتعمل نفسك ميت ليهم

فاكر بكده هتصعب عليهم

لا وحياتك مهما عملت

هجرتي



روح فين وسبتي

لطريق بعيد وهجرتي

هجرت حبي ليك .. بدلت حبك ليا

وبعد ما إتهنت معاك .. جاي تقول لي أنساك

شيل الحاجز اللي بيننا

رجّع الكلمة اللي بتطمنا

فين القلب اللي زمان ناديته

وإديته كل حياتي وحببته

وكنت له سكنه وبيته



برواز وصورة



من بين السطور
باقرا الحروف
من بين الألو ف
اعرف المألوف
في ناس ولا على بالها
وناس تكون زى الملهوف.
كل صورة شايلة ذكرى
شايله حزن شايله فرح
شايله أمانينا
شايله الدمعة اللي
بتفر من عينينا..
شايلة الضحكة
اللى بتنسينا

همومنا وتهنينا
شايه شوق و فرح منخلينا
ننسى الدنيا
شايه ألم شايه ندم
شايه حلم راح من ايدينا .
شايه براءة شايه جراءة
شايه لمس حنان تدفيننا ..
وده كله باين في عينينا..
وكل ده موجود
في برواز وصورة



طير مجروح



أنا زى طير في السما
لكن جناحة مكسور
جواه حاجات مؤلمة
كأنه ف ققص محشور
عاوز يخرج للنور ويحلق في الهوا ويدور
لكن جراحه معلمة
بيحلم يطير في السما وباصص لفوق بعينيه
عايز يطير انما بالحبال مربوطة رجله
ولو حتى مربوطة إيده
بالعزيمه هيفكها
وهيبقى اليوم ده عيده
لما يفك الحبال كلها



مش حب وخلص



هو مش حب وخلص
ده عشق مليون إخلص
فيه روح ومودة
وكله حنية واحساس
الحب دنيا وجنة
الحب خبر حلو وجالنا
ملا حياتنا فرح
واتبدلت بيه احزاننا
لما الحزن بعد عنا
من هنا بس عرفنا
إننا في الحب وقعنا
هو مش حب وخلص

خليك زي بداية فيلم جميل

خليك ضحكة

صافية ف ليل

نور كل الدنيا بنورك

خلي العمر الجاي طويل

خلي العمر الجاي طويل



وحشتيني يا أمي



وحشتيني يا أمه ووحشتني أيامك
وحشتني يا مّه ووحشتني كلامك وسلامك
وحشتيني يا أمه
وحشتيني لما بتقولي مالك مش سعيده
كنت انتي الإيد اللي بتططب
إنتي بس الوحيدة
لو ترجع بيا الايام تاني
هاثرمي فُ حزنك
وانسى كل أحزاني
كنتي دايمًا بتشيلي عنا كل أحزاننا
مانتي الوحيدة يا أمه
اللي بتمسحي دموعنا
لو مشيوا كل الناس

وبعدوا عننا ما فيش غيرها
هي اللي بتضمننا
وحشتيني يا أمه
وجعتي القلب بفراقك
بقيت ابات علي بابك
وادور في وشوش أحبابك
يمكن الاقي فيهم حنية
وهي فين الحنية؟
بقيت ابوس ترابك
اللي تحته محمية
وحشتيني يا أمي وحشتيني يا أمي



100 موال



من كتر الجرح نسيت الفرح
وقلبي غنى 100 موال
من كتر الغم انا شيلت الهم
مش هارجع تاني مهما اتقال
أنا شيلت كثير جوايا ما لقتش حد معايا
دوّرت كثير حواليا ما لقيتش إلا خيال
دورت كمان على حبي
وصبرت كثير على جرحي ولاموني كثير عزال
شاورت عقلي كثير واحترت
وقلبي ندهت عليه وسألت
ما لقتش إجابته لأى سؤال
من كتر الجرح نسيت الفرح
وقلبي غنى 100 موال



هنبكي على مين؟



هنبكي على مين ولا مين؟
ده احنا يا خلق مش لاحقين
نمسح دموعنا،،
و لا الانين والحزن جوانا
بقوا ساكنين،،
الفرحه ماتت جوانا
ننده عليها مش سامعانا
ننده بعلو الصوت
ننده بصوت مكبوت
مش شامين غير ريحه موت
بننام ونخاف نصحي على صوت
قطر بيولع وناس بتموت
القلب بات موجوع

كنا بنخاف م الجوع
بقينا نخاف م الموت
كتر في بلدنا التابوت
بقي له أهمية كبيرة
بنعبي فيه الموت
وجواه شهدا كثيرة
يارب انت المعين
إرحم قلوب المومنين
واجعلنا م الصابرين
هنبكي على مين ولا مين؟



رجعت تاني



إبعد عني الساعة دي
أنا قلبي عليك مش راضي
يا قلب قاسي وانجرح
وعمره ماشاف الفرح
حتى الزرع في أرضه
عمره ما ف يوم طرَح
إبعد عني وسيني ف حالي
مش هأقولك على اللي جرا لي
ما انت زي ما انت
ناسيني ولا داري
وانت حالك زي ماهو
و انا اللي فاكراه انصلح

ما خلاص ما بقتش فارقة
وضاع كل اللي كان
وانا اللي بقيت مفارقة
وحبك ليا كان زمان
رجعت تاني انده واقول
إن قلبي محتاج لك
على طول محتاج لودك
ومحتاج لقلبك
بس مكسوف يقول



حب فات



مابقاش كلامك يهزني
ولا بقي غرامك يهمني
هربت بعدت ولا بتودني
إحساسي مات وشموعي انطفت
حبي ليك بقي ذكريات
مهما الإيدين طبطبت
هو وقت عدى وفات
ماجتش ليه النهارده
ده الكلام أصبح سكات
والنهارده وبكره عدى
نغمض عينينا نشوف ضلام
نفتح عينينا مات الكلام
وايه بايدينا غير نقول

احنا تمام
القلب ماشي ف سكته
راضي بنصيه وقسمته
الأيام زي بعضها
والأحزان بنودها
وعايشين راضيين بحكمته



مكتوب



مالك يا دنيا
ماشيه بالعكس
والمقلوب
الطيب فيكي بينداس
والشرير هو المحبوب
اللي بيجرح الناس
بيتشال ع الراس
واللي بيراعي الشعور
هو المغلوب
إسأل عني الزمان
هيدلك على مكاني
وارجع بيا لزمان
وباحساسي الأولاني

حتى النبض مابقاش
طالع من القلوب
يلف بينا الزمان
ونحكي ونقول
كان يا ما كان
تبص في عينيه تقول حنين
تلاقي الشر جواه
ومش مبين
ولازم تضحك في وشه
وانت مغصوب
ماتحاولش تعرف فين مداه
العلاج معاك وانت دواه
بالحقيقه اصدمه وقوله
هو ده المكتوب .. مكتوب



حاسب نفسك



عن الحريه كلمني شوية
واسألني إيه اللي اتغير فيا
هأقولك كله من الحرمان
خلانا نقول حاجات وننسى
عمر عدى وفات
ومانفكرش في اللي جاي
ونتوه وسط الذكريات
هتسألني إيه معني الهروب
هاقول لك هو إحساس
السكر في الشاي لما يدوب
نجري نفر و نبعد عن الكل
ومانقدرش نهرب م الحسابات

الظلم والجرح والهوان
مالهمش في حياتي مكان
لو حد قريب مني خان
هادعي له واقول ربنا يهديه
عرفت ناس كثير
بيعملوا حاجات من غير تبرير
وتيجي تسأله يقول لك مش حاسس بالأمان
هانت عليك نفسك هان عليك غيرك
بتشيل جواك وتنفسن مش بيوجعك ضميرك
تتكلم قدامه جميل .. ويدور وشه
وانت تميل على غيرك وتضحك
بتضحك على نفسك ولا عليه
بتشيل ثواب من عليك والثواب بيعود عليه
فبلاش تدقق في اللي بيحصل
مافيش غير ربك تتكل عليه




حيرة



إحترار فينا الزمان وكثرت ليه قسوتنا
وضاعت منا الأيام و راحت فين محبتنا
ضاعت ويا الأمان وابتدلت أفراحنا
والغالي علينا هان وف بعده ولا يوم فرحنا
وزماننا احترار فينا

ماشين الطريق مستنين حد يعدينا
مانبصش لنفسنا بس باصين للى حوالينا
وقلوبنا مكسورة و عقولنا معذورة
ماهى دنيا دوارة بتلعب بينا الكورة
بنجرى فى الملعب وهى تجيب اجوان
وبنلوم ليه نفسنا ده احترار فينا الزمان



الصابرة



هبيجي يوم الصابرة ينفد صبرها
هبيجي يوم السفينه ترسي على شطها
مش كل حاجة تايهة منا هنلاقيها ف وقتها
السنين عدت علينا واحنا شايلين في حملها
عقرب يلف في اتجاه وعقرب يلف عكسها
ماهي الدنيا مش هتضحك غير للي يحبها
الدنيا علّمت علينا والمكان تاه عن عينينا
كنا فاكرين اننا ماشين
وهي ف مكانها واقفه بينا
وهي ف مكانها واقفه بينا



الوشوش



شيلوا الرتوش و اغسلوا الوشوش

وعن وش صادق ماتدوروش

الناس ليه بتلف وتدور؟؟

وتتوهك عن الحقيقة

دايما تحب تعيش في الدور

وتبان لك في الصورة بريئة

ماتصدقش مهما اتقال لك

خلي إحساسك هو يدلك

عن الحقيقة ماتستغنوش

دور ع اللى يقدر قيمتك

إمسك فيه وما تسيبهوش

يهرب منك ولا يتوه

وإن فكر يوم يبعد عنك ..

سيبه في حالة وماتحايلوش .



عيون حبيبي



عيون حبيبي البريئة
قالت لي على الحقيقة
قالت لي إني بحبك
ومش هافارقك دقيقة
بحبه أيوه بحبه
ودوبت كمان في حبه
خلوه على قلبي يهدى
قولوا له دي مش طريقة
عيون حبيبي ف جمالها
تشوفني ماشية قبالتها
تنادي باسمي و تهتف
تشوف أميرة ف دلالتها
تقول لي قلبي وروحي

بُعدك ده همي و جروحي

بتيجي لحظة تروحي

وقلبي بُعدك في ضيقة

عيون حبيبي حكاية

لو حتى ثانية معايا

أبص فيها بتحكي

في الثانية ألفين حكاية

تقول حبيبي أشوفها

عليا يظهر لي خوفها

تقول دا حبك ياعمري

من ربي كانت مشيئة

يا بويا وامي وعمي

يا عشق يجري في دمي

ماحلي عيونه ونورها

لما باشوفها باسمي

وارجع واخذها معايا

يفرد لي رمشك في ضله
يفتح لي نورك هلاله
وينور العمر كله
والبدر يوصل كماله
بعيون حبيبي الرقيقة





مربعات

همسه فرح



صبح نادى على احابى
صحيت لقيتهم على بابى
ينادونى بشوق ويسألونى
عن غيابى .. فسكت وداريت
عليهم عتابى ..

صبح البنفسج الفواح
تعالى ننسى أى شىء راح
عشان نفوسنا تهدى وترتاح
ويتبدل الحزن بالأفراح



عیش حیاتک



عیش حیاتک

هزار فی هزار

الهزار حلو

بس مالیش انا فی المزار

أنا لیا فی الحلو


مش هاتعدی حدودی

ومن حیاتک هالغی وجودی

وماتفکرش هاعیش فی نار

مش هاعیش زی العبید .

وهاکون من الأحرار



ضيف



ما تخليش نفسك ضعيف
والدنيا تهدف حيلك
إنت جاي فيها ضيف
هتمشي وتسيبها لغيرك

كلمة شكر



كلمة شكر وتقدير
هتوفر علينا كثير
لو فضلت طول العمر تدي ..
وجيت في يوم بطلت
هيلوموا عليك بسبب التأخير



أنا لىك



أنا قلبى بين ضلوعك
وعينيك اللى بتشوف بيها
أنا اللى بامسح لك دموعك
وما تقدرش ف يوم تجافىها
باستنى يوم رجوعك
والنار اللى قادت فىا
من غيرك راح يطفىها
نفسى أعىش وسط إيد
تطبب بحنىة
وعيون تكون شائلة
الفرح لىا
ولو حزنت ف يوم
تقرأ الحزن فى عىنىا



كله بىعدى



ما بقتش حاجة تفرق عندى

كل حاجة بقت عادى

كله بيروح ويىعدى

مش هأفضل ادلع وادادى

تعبت اخبى جوايا

تعبت ماتكونش ويايا

حلم كبير




موثوا الفرحة جوايا

هديتوا حلم كبير

هتعملوا إيه تانى ويايا

ماكفاية ده كده كثير.



كلماتي




كلماتي بسيطة وعاجباني
كلها أحاسيس و معاني
لو تفهم إيه أقصد منها
عمرك ماتتوه ولا هتعاني

ضحكة من القلب



الله على ضحكة حلوة،،
في وسط فرحة ولمة،،
ونسمة فيها غنوة،،
تتبدل تبقى فرحة،،
وتبعد عنا الغمة،



ناسيني



نسييتني ف وسط توهتك
وماسمعتيش لما ندهتك
بتفكر فيا بس وانت خالي
وتاني تروح و تطول في غيبتك

إحساس



إحساسي بيك إحساس محال
حاجات تتحس من غير ماتتقال
زي عزف الربابة على الموال
في العشق غنيت له خضرة و متقال



حلمي



هأدور وشي و أبص لحلمي
يمكن في يوم يتحقق
وهارمي ورايا تعبي وألمي
وفي كل التفاصيل
مش راح ادقق

تايه



تايه من نفسك و لية متحير
يومك وأمسك جواك ومنور
أبوابك كلها مفتوحة
وانت علي المفاتيح بتدور



تفسير



قلت مش هتخسرني وانا صدقت
مع أول موقف بيننا إنت اللي بعت
كنت عاوز اقول بحبك ماعيونى قالتها كثير
ولا اقول كلمة واحشني أنا تعبت من التفكير
وليه اقول كثير وافسر
ده كلامي مش محتاج تفسير

خسارة



أحلام جميلة عشتها وبنيتها
ولقيت اللي يهداها مني ف ساعتها
وخوفت من دموعي تنزل فداريتها



البيوت



عدي على كل البيوت
هتلاقي أبواب مقفولة
خبط على أي باب
هتلاقي القلوب مجروحة
لو سألت أي قلب عن حبيبه
هيقول كان أحلى حب
وضاع في دقيقة.

الليل



سهرت الليل بطوله
من أوله لآخره
فكرت في كل الحلوين
والوحشين اتآخروا

قشرة




أشوفه من بعيد ذهب
بيلمع في عيني
ولما اقرب منه يطلع
قشرة وذهب صيني

نجوم



طفيت النور اللي في عينيا
بعد ما كان بيلمع ويلالي
وشبكت إيديك في إيديا
توهنتي في عد نجوم الليالي



الماس



الإنسان إيه غير إحساس
حب وكره لكل الناس
مهما حاولت انك تداريه
ولا حاولت انك تجافيه
برضوا هيلمع زي الماس

حظن دافي



ياحظن دافي في ليل صافي
حظنته بين ضلوعي..
ولفيت إيده على كتافي
..العشق عاوز قلب عافي
وهاوصل حتى .. لو مشيت حافي



صورة مشوشة



ماتشوش الصورة قدامي
بعد ما كانت ظاهرة وواضحة
ما تفكرش إنها عاجباني
غدر وهجر ووشوش كالحة
واوعى ف يوم تستغباني
وتقولي النيل مايته مالحة
ماتهرش و تضحك تاني
وخلي كلامك جد شوية
واوعى في يوم تتحداني
وتسيب الناس تستهتر بيا



الشاعرة في سطور



- شاعرة تكتب الفصحى و العامية
- قاصة ولها مجموعة قصصية تحت الطبع
- فنانة تشكيلية لها مجموعة كبيرة من اللوحات والبورتريهات ولها معرض في الفنون التشكيلية بالقاهرة 2018.
- صدر لها ديوانان بالعامية
- شجون وفنون .. لوني متلون بلونك ..
- ولها تحت الطبع مجموعة قصصية
- عضو نادي أدب المنيرة
- شغلت موقع مدير نادي طلائع أوتار 2017/2018
- تم تكريمها من العديد من الكيانات الأدبية رفيعة المستوى .
- وتم استضافتها كضيف شرف للكثير من الأمسيات .
- عضو مؤسسة بنت الحجاز



الفهرس

- بطاقة الكتاب (2).....
- تقديم (3).....
- اهداء (4).....
- الطريق الغلط (5).....
- خليك باصص فوق (7).....
- أوقات (9).....
- صرخة مكتومة (11).....
- ساعدني انساك (13).....
- عكس التيار (15).....
- لما تكون بتحب بجد (18).....
- متفقين (20).....
- كلمة تشبه لها (22).....
- معذور يا قلبي (24).....
- الله عليك (26).....
- قلبي دق (28).....
- بقينا كده لية (30).....
- لية اكون لك (32).....
- انا الصديق (34).....
- احساسى (36).....
- سماح (38).....
- احنا لبعض (40).....
- وهم وخيال (42).....
- قد الكلمة (44).....
- نصيحة (46).....

- مليون باب (48)
- قلبي حبك (49)
- انتصارنا (51)
- لوني متلون بلونك (53)
- طبع غالب (55)
- صوت الموت (58)
- برواز وصورة (59)
- طير مجروح (61)
- مش حب وخلص (62)
- وحشتيني يا امي (64)
- 100 موال (66)
- هنبكي علي مين ؟ (67)
- رجعت تاني (69)
- حب فات (71)
- مكتوب (73)
- حاسب نفسك (75)
- حيره (77)
- الصابرة (78)
- الوشوش (79)
- عيون حبيبي (80)

(مربعات)

- همسه فرح (84)
- عيش حياتك (85)
- (ضيف) (86) (كلمه شكر)
- انا ليك (87)
- (كله بيعدى) (88) (حلم كبير)

- (89)(ضحكة من قلب) -
(90)(احساس)(ناسيني) -
(91)(تايه)(حلمي) -
(92) تفسير -
(93)(البيوت)(الليل) -
(94)(قشرة)(نجوم) -
(95)(الماس)(حزن دافي) -
(96) صورة مشوشه -

